

景定建康志卷之三

建炎以來詔令

所錄惟大詔令凡宰執使相被命爲都督宣撫制置大使及守臣之被特恩而可考者錄之

**建炎詔幸江寧府**國家歷運中微干戈未弭因時巡省蓋順權宜以江寧府王氣龍盤地形繡錯據大江之險茲惟用武之邦當六路之衝實有豐財之便將移前蹕暫駐大邦外以控制於多方內以經營乎中國尚慮有司排辦過於奉承百姓追呼疲於道路儻齊民之或擾豈菲德之敢安將來巡幸緣路州郡及兩浙路江東監司江寧府不得分毫騷擾以安人心

建康志卷三

一

三年三月二十八日

**詔改江寧府爲建康府**建康之地古稱名都旣前代創業之方又

仁祖興王之國朕本繇代邸光膺寶圖載惟藩潛之名實符建啓之義蓋天人之允屬况形勝之具存興邦正議於宏規繼夏不失於舊物其令父老再覩漢官之儀亦冀士夫無作楚囚之泣江寧府可改爲建

康府其節鎮舊號如故

三年五月八日

**制授劉光世江南東路宣撫使建康府置司門下朕**

觀高帝創興王之業亦安能久居於漢中孝文懷良將之風則未嘗不在於鉅鹿眷吾當世之傑克繼昔人之賢旄袞交輝俾東西而作鎮鼓旗相應庶表裏以濟功載洵休辰敷告列位起復寧武寧國軍節度使開府儀同三司充兩浙路安撫大使馬步軍都總管兼知鎮江軍府事兼管內勸農使彭城郡開國公食邑四千八百戶食實封二千一百戶劉光世威嚴而持重沉毅而尚謀勇冠軍中幼已從於父戰名聞閩外壯自取於侯封屢宣入衛之勞茂著勤王之績

迨偃藩於京口實扞寇於淮瀆吳漢在軍隱若敵國李勣護塞賢於長城盡經理之百爲見忠純之一節幸天心之悔禍屬敵境之按兵敢恃小康遽忘遠略臨泗濱而列戍良所重煩撫江左以宣威式從改命益資雅望還控上游視黃閭以參華仍墨纒而從事申加采食昭示邦彝廉藺相歡應體公家之急賈馮不伐佇觀遠業之成於戲殫廩廡之儲以豢兵斯欲賴一朝之用極名器之寵而命帥豈其美百姓之觀維予一人注意以疇咨與彼萬方勞心而屬望爾之

責也往其欽哉可特授檢校太傅依前起復寧武寧國軍節度使開府儀同三司充江南東路安撫使建康府置司加食邑五百戶實封三百戶封如故主者施行

**賜劉光世辭免不允**詔勅光世省所再上劄子奏辭免恩命事具悉朕以安危之計寄於二三將帥之臣既命世忠出營淮泗則夫建鄴上游之地非時偉望其孰鎮之惟卿忠誼世濟勲名並高茹痛銜恤起從戎事家讎國患寧忘厥圖發號移屯軍聲益振固已威先萬里之外矣方茲委重宜有寵行顧將相之官已登極品則帝傅之秩姑示褒崇往體眷懷毋煩堅避所請宜不允故茲詔示想宜知悉

**賜江東宣撫使劉光世**詔勅光世朕惟吳越之區既畱警蹕江淮之險宜植藩籬顧貴池姑孰之津直下蔡歷陽之會接九江之衝要臨建業之上游分宿重兵是資偉望眷予勛舊深體艱虞聞指意以具孚請從移戍馳封章而來上曾靡告勞卿能若斯朕復何慮載嘉恭順深動歎咨惟孝以親則必揚後世之名

惟忠於君則當徇公家之義念此中外安危之計屬卿二三將帥之臣情若弟兄母蓄閱牆之怨義均寮案共輸許國之誠所期戮力以同心用克折衝而禦侮丹青不朽將竝列於雲臺帶礪弗渝亦咸書於盟府乃所望也豈不韙歟已除卿江東淮西路宣撫使故茲詔示想宜知悉秋冷卿比平安好遣書指不多及**賜建康府路安撫大使呂頤浩乞給假不允詔勅**頤浩省所奏比因飲食不時遂致胃弱因傷寒變爲瘧疾伏望俯念衰殘給假將治纔候稍安卽兼程起

發前去事具悉爲臣之規固重於進退許國之誼宜徇於安危乃眷元臣實勤多難扁舟徑去身雖遠於朝廷魏闕遐瞻心諒存於王室屬此防秋之急肆先作牧之求素志克伸何恙不已中興江表今復見於夷吾薄伐太原尚有勞於吉甫其趣介圭之覲副茲仄席之思所請宜不允仍依累降指揮疾速前來行在奏事訖之任故茲詔示想宜知悉秋熱卿比安好遣書指不多及

**賜建康府路安撫大使呂頤浩辭免不允詔勅**頤浩

省所劄子奏辭免恩命事具悉君子處己以用捨爲行藏大臣立朝寄安危於進退卿中辭政柄出擁齋旄閔勞機務之繁優假眞祠之逸惟乃心王室能忘國步之艱顧無瘡老臣用倚帥藩之託賜環趣召弭節來朝蒼生之望素高元老之猷益壯垂紳正笏精神端可以折衝緩帶輕裘談笑何難於卻敵維吾舊德宜體眷懷勉圖克復之功母徇撝謙之節所請宜不允故茲詔示想宜知悉

**紹興賜葉夢得辭免安撫大使不允勅書朕惟多事**

以來厥民塗炭大軍之後所至荆榛日求綏馭之良庶復纂承之舊惟大江襟帶之會實前古國都之餘地關安危勢控南北豈獨賴兵民之鎮蓋將期農戰之脩非吾耆舊之英孰任倚毗之大爰頒優詔用昇劇權謂與人而同憂必不日而引道乃形遜櫝殊拂眷懷其趣屆於提封以毋勤於軫慮所請宜不允故茲詔示想宜知悉秋冷卿比平安好遣書指不多及

**賜江南東路安撫大使兼知建康府充壽春府滁濠和州無爲軍宣撫使李光辭免不允詔勅李光省所**

奏辭免恩命事具悉朕惟侍從之賢出入迭用其在朝則矢謨禁闥爲腹心之臣在外則折衝大邦膺屏翰之寄時有緩急任隨重輕朕方擢卿從班首冠六聯之長屬建康謀帥所急在茲雖坐執銓衡甚宜其職而宣威方面無以踰卿肆陞祕殿之華以壯長城之託亟祇成命勿事牢辭所請宜不允

**賜鎮江建康府宣撫使韓世忠**詔勅世忠朕惟時已戒寒守當嚴備循江流而扼險顧力散以難周聯形勝以宿師則勢專而易應眷昇潤東西之府據江淮

南北之衝走集所趨舳艫交會封疆之接雞犬相聞曾無數舍之遙奚假兩軍之重乃命江東之戎更莅池陽遂因京口之屯竝臨建鄴仍資威望分控長淮惟卿勇不顧身忠無擇事寬其分部庶能展足以赴功睦乃比鄰尚克同心而濟務念國家之至計繫將相之協恭勉就大勳毋懷小忿譬猶捕鹿要爲犄角之圖有若獻豸皆獲公私之利往體朕意佇觀厥成已除卿鎮江建康府淮南東路宣撫使故茲詔示想宜知悉秋冷卿比平安好遣書指不多及

乾道御札賜知建康府江東安撫使史正志金帶朕以江東方面控制兩淮卿能悉意奉公協濟王事職務振舉朕實嘉之今遣中使甘昇賜卿金帶以示褒勸之意至可領也

五年十一月

**賜新除知建康府洪遵詔**厥今重鎮莫如秣陵異時謀帥多取政塗之舊非特藉賴威望填臨兵民亦惟嘗侍帷幄知德意志慮之詳焉卿文學政事著于中外當塗分守尤號循良寬吾顧憂無易卿者夫繇諸侯而列方伯釋銅魚而佩玉麟固足以爲吏士之光

建康志卷三

七

矣况乎粉榆故鄉近在封部之間哉勉稱恩榮毋煩

遜避

七年六月十二日

**淳熙御札賜知建康府江東安撫使劉珙勅**劉珙朕軫念元元靡忘宵旰每郡國小有水旱之虞則焦勞惻怛惟恐一物之失所非得吾九牧之良憂國如家視民猶已飢者推吾此意先事而爲之備安能拯斯民於無事哉卿以樞機舊臣往釐別都屬竝江諸郡歲適不登而建業爲甚乃能前慮卻顧預講荒政或廣儲而賤糶或發廩以勸分或旁糴於荆湘或汎招

於商旅凡可以爲賑恤之具靡所不至是以穀雖儉而市價不翔田畝雖傷而農人不至於飢餓轉徙今茲多稼新穀已升則斯民遂可以免艱食之患而安有生之樂矣夫豐荒之事所不能無然方民病而後圖與夫先事而爲計其利害得失則固有間此趙抃之所以守越蘇軾之所以守杭皆知是道而朕之所以有取於卿不忘乎嘉歎也故茲獎諭想宜知悉秋熱卿比平安好遣書指不多及

賜劉珙辭免不允詔朕深懲守帥之數更遴擇循良

而久任眷陪都之重地煩宥府之舊人逮此累年底于多績召公南國當自適於憩棠裴度北門顧奚妨於臥鎮寧容引疾遂欲合符勉思自養之方庸體仰

成之意所請宜不允

五年閏六月

賜知建康府陳俊卿詔大江東西竝置連帥其屬任等耳若乃外控淮甸內屏浙右建牙作牧兼寄畱都之管籥則於選擇抑又重焉卿蚤傳初潛簡知惟厚久儀宰路望實具孚前以從臣攝行帥事凡兵民之利病江山之形勝固嘗深思而熟講矣嗣成前績人



胥謂宜矧卿不憚暑行既開洪府今秋高氣爽舟輿安適造朝之鎮乃復告勞乎式遄其驅母遏朕命所

辭宜不允

五年八月十日

**紹熙御札賜知建康府江東安撫使章森勅章森省**所奏劄子創造見管軍兵營屋等事具悉陪都重地軍籍尤備聯校束伍必有營壘之固而事功創舉實資長才卿禁涂之英折符守籥政平訟理民用安業乃能以其餘力體國遠慮列楹舊址繕治一新夫經畫有方則民不病擾居處既定則士不知勞若兵與民均安而亡害且足以倣軍實脩武事爲藩翰經久之計其利博矣成勞上聞深爲嘉歎故茲獎諭想宜知悉春暖卿比平安好遣書指不多及

**除曾從龍督視軍馬制門下**朕祇承洪業遠慕駿功督江左之軍而國勢張晉賴謝安之略視淮右之師而皇威暢唐資裴度之籌顧采薇治外之孔嚴宜烝民任賢之尤急妙簡元樞之望盡提諸將之權肆諏剛辰式渙孚號金紫光祿大夫知樞密院事兼參知政事曾從龍學醇而識邃德厚而器閎蚤擅兩都之

倫魁蔚爲三代之王佐炳謀國之智先見洞乎蒼龜  
勵事君之忠精誠貫乎金石再踐政塗之峻獨顯宥  
府之崇一念慮必圖乂於邦家一訐謨必思安於社  
稷氣塞乾坤之大志期宇宙之清蠹鞮鞞之黠戎乘  
女眞之末緒并吞諸郡莽萬里之邱墟蹂躪中原慘  
兆民之塗炭不顧夷夏大分之定不思帝王正統之  
尊敢嘯餘兇自干顯討况太一之神來格久占福曜  
之臨而甲子之歷有開適應初陽之復趣迎善氣特  
命元戎皇天付予有家莫重要衝之守寧王遺我大

寶適資艱運之扶維文武之全才蘊沉深之大略就  
陞使領仍衍井畚總表撐裏拓而庭規摹合前茅後  
勁而受節度風生草木聲震山川聖策定則有功可  
必應兵之勝眞儒用而無敵何難賊虜之平注倚非  
輕延登有待於戲義問之拒逆亮收萬全於指顧之  
間張浚之卻僞齊奏三捷於談笑之頃朕方恢於祖  
烈爾宜邁於前修衆思集則精神彊列戍睦則首尾  
應亟菑攘於外侮用勩相於中興可除樞密使督視  
江淮軍馬加食邑食實封

除新知建康府曾從龍參知政事制勅慶歷之開太  
平范仲淹爲參預元祐之新大化呂公著爲疑丞朕  
遵晦十年厲精一旦趣召先朝之彥俾還近輔之  
聯誕敷絲綸敷告簪紱資政殿學士新知建康府曾  
從龍學根乎正大氣抱乎純明其重足以挫衆紛屹  
然鼎呂其靜足以燭羣動瞭若蒼龜蚤服在於大僚  
耻苟同於汙俗不合則去有待而行鶴鳴九臯久聞  
聲而樂只鳳翔千仞迄覽德以來思予興相見何晚  
之嗟爾動可爲忠言之喜舉昔大對勸今力行嘿有

契於此心期共繇於斯道更化則可善治宜增重於  
本朝折衝何必臨邊奚尚勞於外服爰輟居畱之寄  
聿嚴共政之圖莅勅局以提綱拓爰田而衍賦併昭  
異數式獎英猷噫六典建於周家莫先乎設參而置  
輔庶績凝於虞室尤在乎同寅而協恭勉殫訏謨之  
忠共濟垂拱之治可除參知政事加食邑五百戶食  
實封三百戶

除趙葵督視江淮軍馬制

續兼知建康府江東  
安撫使行宮畱守

門下

朕若稽在昔無競維人南仲往城而獵狁于襄文后

所以嚴治外之政召虎來旬而淮漢庶定宣王所以成攘夷之功我有蓋臣夙蘊英略允謂文武兼資之彥久贊東西二府之權庸就樞聯陞進使範仍執國政翼宣化原茲適會於時艱所當急者兵務用煩戒道俾往視師士聽無譁王言作命通奉大夫知樞密院事兼參知政事權監修國史日歷同提舉編修勅令同提舉編修經武要略長沙郡開國公食邑三千三百戶食實封六百戶趙葵抱開物成務之學富康時經遠之暮識洞幾微得知國知兵之要世傳忠孝

播有臣有子之詩顓經制者十年盡劬瘁之一節膚公入奏旂常之勳績屢書威譽再馳旃裘之君長咸怖出則老熊當道入而猛虎在山休名雅似於仲淹勇退直希於若水屬時改紀有詔予環甲兵之問至廟堂肆俾分治股肱之寄在忠力未嘗辭難種蠡霸越之可期房杜相唐而有待載疇績用趣正使端當疆事之未寧而戎情之叵測分數不明而兵屯無以統一賞罰不信而士卒無以激昂孰寬顧憂卿獨勇往惟氣勢合則可以制勝惟精神運則可以折衝水

陸之備必嚴風寒之護必密兵事不由中御盍思運量之宜廷臣汝擇自從盍廣忠賢之助實倚長算克濟多虞廟論既得以參聞治脉庶幾於融貫並衍邑租之入於昭禮貌之隆於戲王導仗黃鉞而督晉師江左賴之清晏裴度荷雕戈而執蔡醜淮右以之底寧聖策定則有功眞儒用則無敵罔愧前哲則維汝能可特授樞密使兼參知政事督視江淮京西湖北軍馬依前通奉大夫長沙郡開國公加食邑一千戶食實封四百戶

**賜趙葵辭免不允**詔勅趙葵省所奏劄子辭免兼知建康府兼行宮留守江東安撫使恩命事具悉朕觀晉人備禦北方之略大將必有定居戴淵都督六縣而鎮合肥桓冲亦督七州而鎮上明所以據形勢立根本也卿以夙望授鉞既合江淮荆楚而盡護之陪都畱鑰之寄復付卿而不吝者亦晉人命戴淵巨冲意也兵事尚密卿勿多云所辭宜不允故茲詔示想宜知悉

**特轉趙葵三官制門**下朕倚任大臣飭嚴外治籌帷

幄而決勝夙推謨略之長錫斧鉞以視師允藉威名  
之重屬虜氛之告警幸邊備之素脩遂以捷聞用寬  
憂顧猶未舉舍爵策勳之典其可稽加地進律之恩  
誕告朝倫咸聽朕命通奉大夫樞密使兼參知政事  
督視江淮京西湖北軍馬兼知建康軍府事兼管內  
勸農使兼行宮留守江南東路安撫使馬步軍都  
總管兼營田使提舉編修經武要略權監修國史日  
歷同提舉編修勅令長沙郡開國公食邑四千三百  
戶實封一百戶趙葵恢閔而沈厚剛大而裕和識足

以照萬微智足以應羣動知子莫若父嘗許以開濟  
之才事君能致身所守者精忠之節再踐凝密益資  
贊襄頃緣疆場之間慮有甲兵之問迨天之未陰雨  
如人之護風寒若思患而爲之防當先事而爲之備  
於時有建督之議適契予衷俾卿冠環樞之聯特爲  
朕往覽觀上下流之勢激昂文武士之心經營孔艱  
處分已審此虜不足平也恃吾有以待之俄聞蠡蜃  
之來敢肆犬羊之侮我衆素飽坐折遐衝王師如飛  
欲賈餘勇事豫則立而策先定故兵應者勝而力

不勞已信敵愾之威正欲解嚴之際以精誠體國厥  
既肯畱念股肱服勤宜先懋賞是用陟三階而眡左  
光祿之舊陪多邑而食我公田之腴以示恩徽以隆  
枋任於戲在師中承天寵丕昭錫命之公鋪淮瀆修  
我戎嗣有還歸之喜兵事以暇而整軍容非禮不嚴  
必和衆而後可定功必有常而後可立武祗若予訓  
以圖爾成可特授宣奉大夫依前樞密使兼參知政  
事督視江淮京西湖北軍馬兼知建康軍府事兼管  
內勸農使兼 行宮留守江南東路安撫使馬步軍  
都總管兼營田使提舉編修經武要略權監修國史  
日歷提舉編修勅令長沙郡開國公加食邑一千戶  
食實封四百戶

**賜趙葵辭免不允**詔勅趙葵省所上表再辭免視師  
暮年特轉三官依前樞密使兼參知政事督視江淮  
京西湖北軍馬兼知建康府江東安撫使 行宮留  
守仍加恩命事具悉朕觀宣王中興之雅知召虎  
平淮之功當其告成用錫爾祉寵命便蕃焉其四章  
曰無曰予小子召公是似釋者謂王欲虎無自謙損

耳五章曰錫山土田于周受命釋者謂使受賜于岐周顯其先也至卒章又曰對揚王休天子萬壽是其拜命必歸美于上君臣俱榮朕甚慕之日泗之捷實卿勝算少遲入覲將圖爾成褒賞之行周邦咸喜今顧本之朝廷與士大夫之力自謂無赫赫之名而欲辭之謙毋已過乎莫府上功已詔第賞俾予一人以寧亦惟汝嘉亟共朕命勿重有請所辭宜不允

拜趙葵右丞相兼樞密使制門下有常德以立武夙資禦侮之臣歌出車以勞還式副登庸之選迺眷機

廷之彥久顓督鉞之雄旬宣既奏於虜公體貌聿崇於次揆其敷言綽以諗朝紳宣奉大夫樞密使兼參知政事督視江淮京西湖北軍馬兼知建康軍府事兼管內勸農使兼行宮留守江南東路安撫使馬步軍都總管兼營田使提舉編修經武要略權監修國史日歷同提舉編修勅令長沙郡開國公食邑六千三百戶食實封一千八百戶趙葵忠實而疏通沈潛而剛勁鍾南嶽之英氣爲西平之世臣仁不異遠義不辭難蚤奮經營之略文能附衆武能威敵允兼



牧御之長勳績紀于旂常聲名震于草木洵陪宥密  
深簡眷知頃邊遽之戒嚴升使端而授任色詞慷慨  
毅然請行指授雍容慮無遺策盡護諸將于今三年  
坐收泗上却虜之功增重江介留臺之地朕惟折衝  
在乎疆本寬民所以備邊矧將序情而閔其勞肆因  
告成而錫爾社太尉相尊等耳既久居位望之隆人  
傑吾能用之又何愛鈞衡之重爰立諸右式遄其歸  
北斗神樞仍本五兵之柄金章紫綬峻躋二品之階  
併衍畚租特優寵數於戲及閒暇而明國政朕素定

於宏摹建輔弼以成天功爾尚欽於明命必和衆乃  
爲保大必同心斯可圖安克壯其猷祇若茲訓可特  
授金紫光祿大夫右丞相兼樞密使提舉國史院實  
錄院提舉編修國朝會要提舉編修經武要略長沙  
郡開國公加食邑一千戶食實封四百戶主者施行  
**賜趙葵辭免不允詔勅趙葵省所三上奏辭免特授**  
金紫光祿大夫右丞相兼樞密使長沙郡開國公加  
食邑食實封恩命事具悉朕以卿久勞于外延登次  
輔既命撤幕屬邊以遽告爲朕少留江上指授吏士

非臨機達權疇克爾載覽封奏知虜已遁去介圭入  
覲茲惟其時遂欲歸田何耶詩云來歸自鎬我行永  
久此吉甫所以多受祉也式遄其驅以副欽佇所辭  
宜不允不得更有陳請令疾速赴都堂治事故茲詔  
示想宜知悉

**除馬光祖沿江制置大使知建康府兼江東安撫使**

**制**朕疇咨舊人易畀鉅鎮召虎之經營江漢夙敏戎  
公畢公之申畫郊圻用成嘉績載加徽數式重中權  
端明殿學士正奉大夫京湖安撫制置大使兼知江

陵軍府事兼管內勸農營田使兼夔路策應大使兼  
總領湖廣江西京西財賦湖北京西軍馬錢糧專一  
報發御前軍馬文字提領措置屯田兼京湖屯田大  
使武義郡開國侯食邑一千戶食實封壹伯戶馬光  
祖剛毅近仁質直好義老略經世入麓細之才俊識  
爽邦該體用之學頃繇留鑰往填上流商畫邊籌指  
授將略墾田積祐之粟募兵捐燧之貲士飽而歌人  
百其勇雅分憂江湖之上數布喜京峴之間時嘉乃  
功旣錫爾祉荊州控聯蜀道雖盡護西北之風寒建

鄴拱衛行都宜重殖東南之根本惟熟器使則履屐當惟精運掉則臂指隨頻煩元戎十乘之行益壯長江萬里之險以大經制以遠精神百姓如慈母鞠育于懷三軍若嚴師鞭辟其側旌旗爲之改色波濤依然安流肆陞書殿之恩華一新帥垣之風采噫張詠威惠相濟久渴借留之心頤浩彈壓爲長式慰邇來之望昔尹茲土今見其人克踐前猷母俾專美可依前正奉大夫特授充資政殿學士沿江制置大使知建康軍府事兼管內勸農營田使江南東路安撫使

馬步軍都總管 行宮留守節制和州無爲軍安慶

府三郡屯田使加食邑四百戶食實封壹伯戶

開慶元年二月

**賜馬光祖辭免不允二詔勅光祖省所奏辭免除資**

政殿學士沿江制置大使知建康府江東安撫使

行宮留守恩命事具悉經營南紀久宣闔外之勞保

釐東郊申錫師中之命卿忠忱體國俊傑識時緩帶

輕裘居有邊籌之暇中權後勁克共武服之嚴屢奏

膚公式嘉懋績惟荊州重地旣遮蔽於風寒顧建鄴

陪都宜培植於根本峻升書殿增重制垣載煩戎乘

之行用慰舊鎮之望引以自近諒復奚辭河內得恂  
熟知牧御之略江左有導其究鎮重之規亟體注懷  
毋庸謙執所辭宜不允故茲詔示想宜知悉春暖卿  
比平安好遣書指不多及

勅光祖省所再上奏辭免除資政殿學士沿江制置  
大使知建康府江東安撫使 行宮留守恩命事具  
悉江左東南根本眡周分陝必如召公留愛甘棠庶  
幾重封殖之卿前治建鄴民習教條士知紀律易闡  
上流去思如渴今茲付卿舊鎮是還百姓以慈母三  
軍以嚴師拊摩訓督克成厥終正所望於卿又何辭  
焉所辭宜不允不得再有陳請故茲詔示想宜知悉  
春暖卿比平安好遣書指不多及

**獎諭馬光祖賜金幣** 鴟張之寇肆擾江濱卿始則啓  
元乘以征行繼復集舟師而赴援恤鄰之誼固宜爾  
而體國之念殊可嘉因任進職已示褒寵復頒金幣  
用旌爾勞至可領也

景定元年四月二十六日

**授馬光祖資政殿大學士制** 勅朕儀圖江闡申命制  
臣比援上流嘗藉濟師之力茲敷大號用陞顧問之

班仍專斧鉞之權因任藩垣之寄丕昭寵渥載錫贊  
書資政殿學士正奉大夫沿江制置大使知建康軍  
府事兼管內勸農營田使江南東路安撫使馬步軍  
都總管 行宮留守兼節制和州無爲軍安慶府三  
郡屯田使金華郡開國侯食邑一千四百戶食實封  
貳伯戶馬光祖強毅而端方宏深而肅括志存社稷  
固將左執弭而右屬囊令稟朝廷用能晨受命而夕  
就道往返風濤之上驅馳兵革之間靡憚其勞率先  
以往當彼寇被猖之甚適我兵調遣之艱曲盡乃心

無落吾事爰肆放於褒賞庸懋獎於忠勤加隆名於  
一字之榮仍寵任以六師之重以酬前績以勵後圖  
噫股肱宣力四方身雖居於閫闈君臣相須一體心  
毋遠於闕庭勉對恩徽益思報効可依前正奉大夫  
特授充資政殿大學士沿江制置大使知建康軍府  
事兼管內勸農營田使江南東路安撫使馬步軍都  
總管 行宮留守兼節制和州無爲軍安慶府三郡  
屯田使時暫差淮西總領金華郡開國侯加食邑四  
百戶食實封壹伯戶

賜馬光祖辭免不允詔勅光祖省所奏辭免除資政  
殿大學士仍舊任恩命事具悉陪都爲經營四方之  
根本 中興以來如浚如俊卿皆以元勳碩輔再填  
拊是邦草木知其威名獠虜不敢起飲江之想頃上  
流之備不戒騎塏漲于滸黃至勤宰臣擐甲督戰一  
洗而清之卿累月驅馳上下勞績用懋所調麾下將  
士亦婁以得雋開莫府上功炳如也進書殿之鴻名  
仍闔府之舊寄見知而悅疇不謂宜巽章引避曾是  
以爲榮乎夫師以氣爲主以直爲壯今我之氣直且

壯矣勉圖常武之功嗣對遄歸之寵所辭宜不允故  
茲詔示想宜知悉夏熱卿比平安好遣書指不多及  
御札獎諭馬光祖築宜城勅光祖古舒與秋浦相望  
一衣帶水昔人所謂風寒處也移治以來雖建立官  
吏而蕩無堡障民有搖心或請板築宜城而守之議  
久不決屬者丞相行邊采其策卿以制閩任其事且  
佐其費向之荒墟今爲堅壘設虜南吠猝攻之不能  
克欲舍之深入則懼吾金湯之擬其後此國家以淮  
西三郡隸昇閩之初意也竣事來告忠勞至矣予嘉

乃續寤寐歎賞卿其益恢遠略以紓予北顧之憂故  
茲獎諭想宜知悉春寒卿比平安好遣書指不多及

景定二年三月

**特轉馬光祖**光祿大夫制經始不日而成闡帥幹方  
之略有功見知則說公朝勵世之規眷言藩屏之賢  
能設金湯之險肆盼寵數式獎鄖庸資政殿大學士  
正奉大夫沿江制置大使知建康軍府事兼管內勸  
農營田使江南東路安撫使馬步軍都總管 行宮  
留守兼節制和州無爲軍安慶府三郡屯田使時暫

兼淮西總領金華郡開國公食邑二千三百戶食實  
封四百戶馬光祖挺文武之全才膺安危之重寄當  
鐵騎倏游魂而至佩玉麟分方面之憂樽俎折衝屹  
若蔽遮於近甸樓船下瀨隱然犄角於上流迨邊陲  
之肅清贊廟謨之恢拓自舒移治有郡虛名至煩竹  
符之親臨決就宜城而改築難與慮始昔嗟作舍之  
莫成知無不爲今有制垣之任責二紀之荆榛蔽野  
一朝之雉堞連雲滌灑皖之氛埃生蘄黃之氣勢倅  
圖來上宵旰頓寬其疊進於穹階以顯旌於殊績噫

長江號天塹，卿其護腹背之風寒。聖人有金城，朕方賴股肱之忠力。益閱規畫以副眷懷，可特授光祿大夫，依前充資政殿大學士，沿江制置大使，知建康軍府事，兼管內勸農營田使，江南東路安撫使，馬步軍都總管。行宮留守兼節制和州，無爲軍安慶府三郡屯田使，時暫兼淮西總領金華郡開國公，加食邑四百戶，食實封一百戶。

**賜馬光祖辭免不允**，詔勅光祖省所再上奏辭免任，責浚築宜城，特轉兩官，仍令學士院降獎諭，命事

具悉賞以勸勞，國之彝典，矧宜城板築就緒，遂爲江南一障蔽，厥勞茂矣，勸獎其可已乎？異牘洊騰，備見謙挹，雖曰宰臣之指授，亦惟閫制之經營，二等進官受之，奚過亟祗成命，勿復有言所辭，宜不允，不得再有陳請，故茲詔示，想宜知悉。春寒，卿比平安，好遣書指不多及。

**御札**又**賜馬光祖**，卿忠勤一節，中外具知，長江天塹，賴以安妥，前歲之援上流，舊歲之築宜城，又近績之最著者，朕甚嘉之，薦覽來奏，欲釋閫寄，非朕所樂聞。



也增秩甫新倚重正切願毋遐心嗣對光寵

景定二年

**授馬光祖觀文殿學士制勅**制垣底績聿觀三載之成書殿冠班昭示四方之勸誕頒異數采聳具瞻資政殿大學士光祿大夫沿江制置大使知建康軍府事兼管內勸農營田使充江南東路安撫使馬步軍都總管 行宮留守節制和州無爲軍安慶府三郡屯田使時暫兼淮西總領金華郡開國公食邑二千六百戶食實封伍伯戶馬光祖識遠而氣宏道周而業鉅天機錯綜冰壺玉鑑之高明學力雄渾泰山喬

嶽之負載能應則五官之並用盡忠則一髮之不欺京師衆大之居每思前尹金陵六朝之舊爰重中權逮往撫於荆襄久宣勞於江漢視儀政路式表儒猷趙抃一琴累疏欲歸廉范五袴陪都懷舊宵旰倚寬於憂顧風濤靡憚於泝訟賁然重臨惠此四履郵於冀如制水坐屹勝形晉及楚其餘波具有遠烈方且設險守國造舟爲梁青鐵鑄兵黃金募士或偃息或燕樂予拮据予蓄租旣消騎火之紅正念玉關之老効式臻於久任職乃錫於隆名紫宸地殊非但序遷

之寵金城日壯尚惟柄用之圖繫我鬢髦對揚休命  
可特授觀文殿學士依前光祿大夫沿江制置大使  
知建康軍府事兼管內勸農營田使充江南東路安  
撫使馬步軍都總管 行宮留守節制和州無爲軍  
安慶府三郡屯田使時暫兼淮西總領金華郡開國  
公加食邑四百戶食實封壹百戶

**手詔獎諭馬光祖**勅光祖卿前自渚宮重臨江闔荏  
苒三載勤勞百爲援枹鼓以犄角上流之師悉賦輿  
以板築宜城之壘蒐卒補逃亡之虛籍散金募遊擊

之健兒金鑣綠沉森羅武庫蒙衝鬪艦照映怒濤凡  
皆軍中節縮之贏靡煩公上拋降之助知鞠躬而盡  
力不矜能而伐功載嘉元戎衛社之忠深得大臣體  
國之誼賜璽書而褒美佇袞繡之來歸故茲獎諭想  
宜知悉冬寒卿比平安好遣書指不多及

景定二年十  
月二十五日

**第三次除馬光祖沿江制置大使知建康府江東安**

**撫大使 行宮留守制**勅朕簡求近弼重鎮陪京念  
昔全江淮以濟中興允資碩望矧今崇詩書而謀元  
帥詎捨舊人起之珍間付以居守爰疏茂渥申錫贊

書觀文殿學士光祿大夫提舉臨安府洞霄宮金華郡開國公食邑三千七百戶食實封柒伯戶馬光祖器偉量閎資凝猷遠炳著龜之先見凜松栢之後凋方叔元老克壯其猷歷蕃宣於四國君陳嘉謀入告爾后嘗唯諾於一堂頃以蓋臣荐分江闔投鞭欲渡有飈回霧塞之顯憂杖鉞以先助霆擊電掃之勝勢威名猶在誼槩可嘉朕概念留都控扼天塹雖千羣奚用已屹立金湯之形然一物不牢敢少怠衣袵之戒孰寬憂顧無若老成兵將素服其拊循民吏夙安

其條教龍盤虎踞山川不易於鎮臨魚鑰麟符麾幟一新於號令以壯外攘夷狄之畧以恢北定中原之規噫抃以清脩固再臨於益部琦以勳輔尚三典於相臺勉企前脩益光賢業可依前觀文殿學士光祿大夫特授沿江制置大使兼知建康軍府事兼管內勸農營田使兼江南東路安撫大使馬步軍都總管兼行宮留守節制和州無爲軍安慶府三郡屯田使食邑實封如故

景定五年四月

賜馬光祖辭免不允二詔勅光祖省所奏辭免依舊

職除沿江制置大使兼江東安撫大使兼知建康府  
恩命事具悉維今江閩內護留都每將相大臣往  
任保釐重寄卿碩膚厚德典刑宿儒其威名荐著於  
鎮臨其惠澤素覃於牧守茲謀元帥毋踰老臣昔黃  
霸潁川前後八年而愈治郭伋并部兒童數百以來  
迎成命既頒彼民大悅人惟求舊初何惜於重臨事  
不辭難亦胡爲而多遜所請宜不允故茲詔示想宜  
知悉春暄卿比平安好遣書指不多及

景定五年  
四月

勅光祖省所再上奏辭免依舊除沿江制置大使兼

江東安撫大使兼知建康府 行宮留守恩命事具  
悉己丑詔書諭卿至矣胡猶未孚朕意昔臣仲淹事  
我 仁祖於再撫陝西之日有驚破賊膽之謠顧今  
秣陵爲國鉅鎮表淮裏江而分梱所賴折衝中權後  
勁之得人孰若圖舊是用起卿家食司鑰陪都若夫  
遮蔽風寒之規摹綢繆牖戶之知略駕輕就熟固饒  
爲之母但以膂力旣愆辭速就國可也所辭宜不允  
不得再有陳請故茲詔示想宜知悉春暄卿比平安  
好遣書指不多及

景定五年  
四月

乙丑賜馬光祖丐祠不允三詔勅光祖省所奏乞昇  
叢祠事具悉卿曩事 先帝爲股肱純簡注不忘起  
之家食重付北門之管屹爲長江之防曾未幾時龍  
湖僊去所留以遺予冲眇者一二臣外尤藉卿以寬  
顧憂焉昔人有臥總留臺者豈得遽以疾諗乎如云  
滿歲漸欲引年茲固未可爾其體眷倚益懋壯猶是  
亦卿所以報 先帝之遇也所請宜不允故茲詔示  
想宜知悉夏熱卿比平安好遣書指不多及 四月

勅光祖省所奏乞昇祠廩以便養痾事具悉維周之

隆率東諸侯者以六師申豫防之戒報誥則曰爾身  
在外心在王室上下交修用荅揚光訓訪予落止亦  
惟股肱宣力之臣追 先帝殊外治于間暇之時作  
周匹休卿有方叔克壯之猶膺畢公保釐之寄以國  
爲家以民爲身其可屬負茲而忽徹桑虛商飈寢勁  
江防爲先惜分陰以護風寒精神折衝徒得卿重從  
容裘帶斯可養恬無棄爾成懋乃攸績所請宜不允  
故茲詔示想宜知悉夏熱卿比平安好遣書指不多

及 六月

勅光祖省所再上奏乞祠廩事具悉周經營江滸必  
召伯之有成漢餉餽關中惟鄼侯之專屬師旅以暇  
而整威惠以久而孚卿雖三命於居留今甫踰年之  
宅牧我戍未定靡 歸聘寧不永懷舊人遠省知若勤  
豈宜易退闡寄不可數易疆事毋恃不來與其慕赤  
松之從游孰若勉干木之偃息曷爲洊奏未燭予衷  
不剛不柔而德修足食足兵而民信典聽朕毖圖功  
攸終所請宜不允不得再有陳請故茲詔示想宜知  
悉秋熱卿比平安好遣書指不多及

**御札獎諭馬光祖提師應援覽奏以寇迫舒城元戎**  
銳於一出忠忱爲國威聲愴虜諸將有所倚賴事功  
何患不集予甚嘉之安慶城高池深固無足慮萬一  
有窺江之謀則豫防力遏必使無透漏乃可切宜勉

旃庶寬憂顧

咸淳元年  
八月

**丙寅賜馬光祖丐祠不允二詔勅光祖省所奏乞畀**  
叢祠事具悉卿以文武威風三尹陪京江滸經營厥  
功茂焉召伯有成王心則寧朕用寬北顧之憂采薇  
出車之勤瘁靡日忘之今天塹雖旣清而陰雨之防

不可忽迨我暇矣建威銷萌繫卿是賴其可謂事幾  
沓來而圖田里之安虛謹護風寒惟卿遠慮無恙于  
恤成乃圖功亦惟舊人不克遠省昔元祐初留籥洛  
師者求釋位詔喻之曰視國如家忠臣可以忘年卿  
年未至也勉爲國計勿復懷歸所請宜不允故茲詔  
示想宜知悉春寒卿比平安好遣書指不多及

正月

勅光祖省所再上奏乞畀叢祠事具悉朕聞任賢責  
成者悠久而不易體國經遠者華皓而益堅角巾東  
路之言未聞羊祜之從欲臥護北門之寄豈曰裴度

之辭勞矧卿克壯其猶盍思不解于位耆壽俊在服  
詎宜止足之謀樽俎間折衝奚必驅馳之役儻使卿  
遂山林之志孰爲朕分疆場之憂無踰老臣罔或自  
介用逸所報 先帝亦惟以敕圖功所請宜不允不  
得再有陳請故茲詔示想宜知悉春寒卿比平安好  
遣書指不多及